

Monseigneur Benjamin Marc Ramaroson, c.m.
Archevêque d'Antsiranana
Tél : (261) 32 11 539 39
BP 415
5 Boulevard Le Myre de Villers
201 ANTSIRANANA
Madagascar
bramaroson@gmail.com



« Homba antsika mianakavy anie ny Fiadanana'ny Tompo »
« Tsy isika fa ny Fahasoavan'Andriamanitra miaraka amintsika... »

Ho antsika Olo Araiky Pretra, Voatokana, Lahika

FILAN-KEVITRA IOMBONAN'NY DIOSEZY - FEHIN-KEVITRA

Notanterahina ny faha-16 ka hatramin'ny faha-21 jolay 2018 tao amin'ny Centre Spirituel Saint Augustin ny Filan-kevitra pastoral voalohan'ny Diosezin'Antsiranana. Nandray anjara feno tamin'izany ny tolagna, dia ny Pretra, Voatokana, lahika izay miisa 112, avy amin'ny lafivalon'ny Diosezy. Miaramisaotra an'Andriamanitra isika noho ny fitantanany sy ny fanilovan'ny Fanahiny; isaorana indrindra isika niara-niasa loha na ny lavitra na ny akaiky tamin'ny fanohanana am-bavaka. Tsy tanjona izao fa fanombohana sy varavarana misokatra amin'ny maha-“génération mpanorina” antsika EO.V. Kihondalana eo amin'ny fiainan'ny Diosezy izao nataontsika izao.

Rehefa nampahatsiahivin'ny Arseveka ny hafatry ny Sinaody farany: “Fampitrahofana ny finoana sy ny fiainana an-davan'andro”, nivoitra avy hatrany fa marary ny tontolo iainana, ny tontolom-piainana, ny tontolom-pinoana ka mila fitsaboana.

Niezaka ny mpanandray anjara nandalina isam-baomiera ireo tontolo telo ireo mba hampandrosoana ny pastoral eto anivon'ny Diosezy. Mizara efatra lehibe ny laha-dinika natao: EO.V aho ka mandalim-pinoana, EO.V aho ka mikatroka sy manompo, EO.V aho ka mandray an-tanana, ary EO.V aho ka mivavaka. Toy izao ary ny famintinana ny votoatin-kevitra izay hiezahantsika EO.V rehetra hiainana manomboka izao.

I. EO.V AHO KA MANDALIM-PINOANA

Tsapa fa marisarisa ka mila kolokoloina ny tontolom-pinoantsika. Hita izany amin'ireto sehatra manaraka ireto: Marary ny Fianakaviana (Eglizy Kely), mandringa ny sehatry ny fanabeazana satria tsy ampy isa sy tsy ampy fiofanana, ary miraviravy tanana ny mpanabe amin'ny ambaratonga samihafa, mbola lavitr'ezaka ny fandalinam-pinoana, indrindra fa eo amin'ny fiomanana amin'ny sakramenta samihafa. Mbola betsaka ny olana hita any amin'ny fampianarana katesizy, tsy hita soritra ny fandalinam-pinoana any amin'ny Fikambanana, firohotana sy ny Vaomiera.

Arak'izany dia hataon'ny tompon'andraikitra isan'ambaratongany vain-dohan-draharaha ny:

- fikarakarana manokana ny fianakaviana (Eglizy kely).
- fampiofanana ireo Mpanabe isan-tsokajiny ato amin'ny Diosezy.
- fampidirana anatin'ny fikambanana na firohotana na sehatra hafa misy ao amin'ny Eglizy ny ankizy na tanora alohan'ny hirosoany amin'ny sakramentan'ny fankaherezana.
- fampirisihana ny EO.V hiroso amin'ny sakramenta tokony ho raisiny, tsindriana manokana ny sakramentan'ny mariazy.

II. E.O.V AHO KA MIKATROKA SY MANOMPO

Ilaina ny mikatroka sy manompo mba ho hita taratra amin'izay ataontsika ny finoantsika. Sehatra hampiharana izany ny Fikambanana, ny Firohotana, ny Vaomiera izay rafitra ekena sy entin'ny Eglizy mampifandray sy mampivoatra ny tontolom-pinoana amin'ny tontolom-piainana. Samy manana ny anjara

toerany ireo eo anivon'ny Eglizy sy ny fiaraha-monina. Ao anatin'ireo rafitra ireo tokoa mantsy ny EOV no manamasin-tena, mandalinam-pinoana, miombona, miezaka manampy ireo mpiara-belona aminy ary mampianatra azy ireo hanaja sy hikorokoro ny fananana sy ny tranobe iombonana. Indrisy anefa fa tsy rotoetra ny EOV mirotsaka amin'ireo rafitra telo ireo, ary matetika dia ny lafiny fitadiavam-bola no mibahan-toerana ka hadino ny tanjona sy ny antom-pisian'ny rafi-panompoana.

Noho izany dia:

- hampahafantarina ny Kristianina ny "charisme" sy ny maha-zava-dehibe ny Fikambanana sy ny Firohotana eo anivon'ny Eglizy ary hajoro araka izay azo atao manomboka any amin'ny Eglizy Fiombonana.
- hampahafantarina ny Kristianina ny asa fanompoana eo anivon'ny Vaomiera ka ho ezahina ny hampijoroana azy manomboka any amin'ny Eglizy Fiombonana.
- hentanina ny EOV mba hirotsaka, saingy tsy azo atao ny misabaka, izany hoe ny miditra amin'ny Fikambanana roa na telo samihafa.
- homena anjara toerana lehibe ny fandalinam-pinoana sy ny fizaràna ny Tenin'Andriamanitra any amin'ny Fikambanana, Firohotana ary Vaomiera. Matetika ny finoana tsy lalim-paka no antony lehibe mahatonga ny sasany amintsika hivily lalana.

III. EOV AHO KA MANDRAY AN-TANANA

Miseho amin'ny endrika maro samihafa ny fandraisana an-tanana eo amin'ny tontolom-pinoana, ao ny ara-nofa, ara-tsaina, ara-panahy, eny fa na ny fananana sy ny tontolo iainana koa.

1. Ny hasim-pinoana

Tsapa fa mbola manjavozavo amin'ny kristianina maro ny hevitra ny hasim-pinoana sy ny ampiasana azy na dia teo aza ireo fanazavana sy fanentanana maro avy amin'ny Arsevekantsika mandritra ny famangiany sy any amin'ny taratasiny (Jereo ny hafatra pastoraly faha-3), ao koa ny tatitra mahakasika ny nampiasana ny vola. Ny statistika dia manaporofa fa tena mbola marisarisa ary mila ezaka isika amin'ny fanomezana hasina ny finoantsika. Na dia sarotra aza ny fiainana dia tsy enta-mavesatra ho antsika ny fandraisana an-tanana satria izay tia mahafy.

Noho izany dia:

- Tsy sasatra ny Eglizy manentana ny vita batemy tsirairay mba handray an-tanana (fa tsy ny Ray aman-dReny ihany). Misy ny taratasy (carte) fanamarinana hahafahana manara-maso. Miainga avy any amin'ny Eglizy Fiombonana ny fanatanterahana azy (statistika).
- Atokana ho andron'ny hasim-pinoana ny fankalazana an'i Kristy Mpanjaka eto anivon'ny Diosezy fa azo atao ny misafidy ny fomba sy ny fotoana mahamora ny fanatanterahana azy.
- Atao mangarahara mandrakariva ny vokatra azo (Eglizy Fiombonana, Eglizy Fototra, Eglizy Iraka) sy ny fampiasana azy eto amin'ny Diosezy.

2. Ny tany sy ny fananan'ny Eglizy

Tsapa fa misy ireo fananan'ny Eglizy, indrindra ny tany, tsy voakarakara ka alain'ny olona. Adidintsika ny mikarakara ny taratasy ara-panjakana mahakasika izany. Hasiana "commission" misahana ny fizakan-tany eto amin'ny Diosezy.

3. Ny pastoraly

Hita fa miezaka amin'ny asa fitoriana ny Vaovao Mahafaly ny Pretra ny "Inspecteurs" ary ny Katekista ary tsapa ny fahombiazany, saingy tsy ampy ny fanohanana'ny EOV azy ireo. Noho izany dia:

- Hatsaraina bebe kokoa ny fandraisana an-tanan'ny EOV any amin'ny Eglizy Fiombonana sy ny Eglizy Fototra ny velon-tenan'ny "Inspecteurs" sy Katekista (Ohatra: saran-dalana, saram-piofanana, saran-dasy...) mandritra ny Fiofanana sy fitetezam-paritra (Tournées) ataony.

4. Ny fanabezana (sekoly katolika)

Sehatra iray lehibe eo anivon'ny Eglizy anehoana ny fandraisana an-tanana ny fanabeazana feno: arabatana, ara-tsaina, ara-moraly, ara-panahy ny sekoly katolika.

Maro ny olana sedraina eo anivon'ny sekoly: - vitsy an'isa ny zaza katolika mianatra any amin'ny sekolintsika – tsy ampy traikefa ny mpanabe sy ny Ray aman-dReny ka zary miraviravy tanana manoloana ny ditran'ny tanora ...

Manoloana izany dia:

- hamafisina sy hatsaraina ary hampiharina ny Fitsipika any amin'ny Sekoly
- tsy maintsy hampiharina eo anivon'ny sekolintsika ny taranja EVA sy ny RELIGION.
- hampidirina ao anatin'ny « Conseil Pastoralin'ny Eglizy Iraka » ny VRM (Vondron'ny Ray amandRen'ny Mpiandra) ary ny Pretra kosa anisan'ny Komitin-tsekoly.

5. Ny tontolo iainana

Potika ny tontolo iainantsika satria tsy mety tonga saina ny maro fa zava-doza ny doron-tanety sy ny fandripanana ny ala. Tsy resy lahatra ny olona amin'ny maha-zava-dehibe ny fambolena-kazo ka vitsy ny mandray an-tanana. Noho izany:

- harovana toy ny anak'andriamaso ny zava-boary.
- hajoro eo anivon'ny Eglizy Fiombonana, Eglizy Fototra, Eglizy Iraka ny Vaomieran'ny tontolo iainana.
- hamafisina ny antson'ny Diosezy mahakasika ny fambolena-kazo.
- misy Pretra iray ho tendren'ny Eveka hanara-maso ny fanatanterahana ny Diosezy Maitso ka aoka samy hanaraka ny torolalana avy aminy sy ny ekipany.
- samia manomboka ny diosezy maitso ao amin'ny tokotaniny
- Hamafisina ny Ecole Verte.

IV. EOVAHO KA MIVAVAKA - NY LITORJIA

Toetra telo lehibe no maha-litorjia ny litorjia:

- Tsy maintsy **marina** satria manambara ny finoana katolika.
- Tsy maintsy **mendrika** sady **tsara** (belle et digne).
- **Manabe** antsika amin'ny finoana.

Ny zava-misy anefa dia mbola manjavozavo amin'ny kristianina maro ny famaritana ny tena atao hoe Litorjia. Maro ireo fihetsika na fahazarana iainantsika izay mampihen-danja na mifanohitra amin'ny Litorjia. Hamafisina ny fiofanana mikasika ny Litorjia.

- ny Eokaristia na ny fotoam-pivavahana dia manomboka amin'ny hira fidirana ary mifarana amin'ny hira fanirahana ka tsara hajaina ny fotoana.
- tsy maintsy homanina tsara ny Litorjia (famakian-teny, fanentanana, hira, mpiservy, fitendrena zava-maneno, fanamafisam-peo ...) ary iarahana amin'ny Pretra.
- Manao « Aube » ny mpamaky teny sy ny mpanentana.

Tsara koa ny manamarika etoana mahakasika ny Fanajana Manokana (DEVOTION). Ny DEVOTION dia fitiavam-bavaka na fientanam-panahy manokana hifandraisana amin'Andriamanitra ananan'ny tsirairay na vondron'olona. Ao ohatra ny DEVOTION amin'ny FO MASIN'I JESOA, FO MADION'I MARIA, FAMINDRAM-PO, FANAHY MASINA (charismatique), OLOMASINA...

Ireo Eglizy Iraka ahitana vondrom-bavaka maneho DEVOTION dia tohizana fa ireo mbola tsy misy dia miandry fahazahoan-dalana.

Tsy tanjona izao filan-kevitra izao fa fanombohana. Fampitrahofana ny fiainana sy ny finoana. Génération Mpanorina isika ka aoka ho fola-kevitra, hiombona ho olo araiky ka hanandratra ny Diosezintsika. Tsy isika fa ny fahasoavan'Andriamanitra miaraka amintsika ary izay mitoetra ao amin'I Kristy sy itoerany no mamokatra ary mamokatra be sy feno hafalialana. Ankinintsika amin'I Masina Maria sy Olts Lucien Botovasoa. Mitsodrana anareo aho. Mivavaha koa ho ahy.

Natao teto Antsiranana anio 21 jolay 2018
ALAHADY FAHA-16 MANDAVANTAONA

Mompera Eveka
+ Ramaroson Benjamin Marc, cm

*Benjamin
c.m.*